

夢鶴軒詩

蒙古三多

夢鶴軒棹解詩鈔序

余生也晚不獲與鄉先輩之治詩者聯吟詠接警歎每引以爲憾而
新學後生見聞尤淺自薄其鄉以爲無詩人吁何其謬也遼東詩人
至金代始見稱遼陽張浩然熊岳王黃華皆卓卓可傳誦元代以湛
然居士爲尤著有清一代作者益夥熙朝雅頌集所載多數爲遼東
人顧不盛歟金鎧近年以來每以搜求掌故之心表章文獻之志旁
蒐博采如戴遂堂李廌青陳石閭馬雷溪曹棟亭朱海愚夢文子尹
望山高章之沈香餘劉仙樵王雪樵諸家詩集罔弗購求其無刻本
者則借鈔之省內外友朋譚文藝喜購書知孳孳此事每代爲留訪
馳書相告且有舉以相遺者將伯相助惠我良多尤可感佩於是有
金君息侯贈繆公蘭皋詩稿之事稿係寫本得於海王邨書肆時公
之曾孫太史東麟先生正編輯遺稿猶憾缺失余以息侯所贈者轉
送先生處俾以問世頃將付印屬金鎧爲序不獲辭公號棹解別號

蘭皋瀋陽人以善書名能詩精篆刻工寫蘭早年隨宦江南與陽湖
洪稚存交最篤歸里後更與錦縣金鑾坡鐵嶺尙鐵峯魏子亨遼陽
王義門莊河多雯溪諸君時相唱和公詩不以鉅幽鑿險爲能襟懷
高澹天籟自鳴語語真摯至情流露能使讀者如見其人今幸東麟
先生之誦揚先芬昌明詩學而金鎧以鄉里後輩於搜訪文獻之餘
獲良朋之貺俾不至鄉賢遺稿終於散失益當振刷精神專壹志趣
將吾鄉先輩著述徧事搜羅俾其傳播使後之學者不非薄先民而
因以擴見聞奉爲師楷其於吾鄉之文化或不無小補耶遼陽袁金
鎧序

夢鶴軒棹解詩鈔題詞

符芝壽潛

寄到瑤編夜校讐琳琅滿目不勝收國門擬易千金字溟海何關一
勺投家學蘭陵原有本詩名瀋水定無儔怪來筆底江山助從宦江
南十六秋

三五河東盡少年詩壇老將屬幽燕清新雅調庾開府光燭文章李
謫仙虛節尙然求直筆

先生委校大集寄予詩云但祈直筆不求寬

詢芻應不遜前賢留

都多少能吟客總讓公才一著先

七十餘年歲月深應無別嗜只耽吟直將詩譜爲年譜會有知音定
賞音一覺小軒元鶴夢幾椽幽室綠雲陰

夢鶴軒綠雲窠皆公別業也

此中大有

逍遙處知是先生著作林

栽培桃李郁紛紛冷署閒曹似廣文品石樓前孫繞膝掬波廊上客
如雲名流曾結江南社

公在江南與洪稚存諸公時相唱和詩載集中

吾子真空冀北羣幾

首轅歌歸大雅教公重運郢人斤

夢鶴軒棹解詩鈔卷一

瀋陽繆公恩立莊

題畫

茅屋兩三間雲橫千仞山西風下殘照煙水片帆還

秋日游馮氏廢園

溪水環村舍門迎杜若洲清風三徑曉黃葉一庭秋霜度征鴻遠牆吟促織幽故園何處是引起別離愁

溪上

霜氣橫秋木葉殘夕陽雁影下蘆灘茅堂寂寂人高臥門外雲深水自寒

春日郊游

出城三四里茅舍幾人家踏屐探幽徑敲門問落花風前村店酒雨後小姑茶處處多春漲桃源擬泛槎

春閨

冷雨淒淒獨掩扉無言脈脈望春歸
桃花柳絮關情思莫逐東風一片飛

月下聞笛

何處吹羌笛蕭然到草亭
煙輕籠淡月雲薄帶疏星
一曲催梅落三秋折柳青
援琴方欲和雁陣下寒汀

舟泊焦山作

晴光明素鏡皎月海門浮
蜃氣朝成霧龍吟夜入秋
十年常作客萬里一維舟
憑弔蝸廬叟低回意欲留

春閨

千樹桃花映粉樓東風萬點逐波流
落紅不是題詩葉愁向人間寄得不

水閣納涼同董均可步管丈秋崖元韻

管丈名兆桂鎮江人

一泓秋漲半池荷小榭臨流起細波水氣潛隨花氣散蟬聲遠雜樹
聲多殘霞影落連朱檻新霽煙深鎖翠蘿納爽不知天竟晚已看高
閣轉銀河

前題答董均可

名詩山廡庠生
王作梅之甥

小閣清幽繞芰荷生香十里漾層波雨侵石壁吟蛩少風拂寒林野
繭多斷港殘暉留几榻平橋衰柳伴藤蘿長歌久出巴人下一曲淇
原隔大河

寒月

仙宇蕭騷轉玉繩西風淅淅夜澄澄光飛碧瓦千家雪影挂銀河一
片冰潮落海天秋氣斂煙銷雲漢露華凝嫦娥罷舞開妝鏡霜重霓
裳力不勝

讀張瀛客先生遺稿

鑑冶羣言自一家夜臺蕭索兩年賒古梅雅抱憑誰賞

先生有古梅
寫意詩三篇

寶劍寒芒空自嗟

有劍授匣中三尺水關封谷口一丸泥之句

手蹟只餘書上草心思猶

燦筆頭花遙憐麥飯青松樹黯淡殘陽噪晚鴉

登辛峰亭

亦曰清風亭

孤亭峭立壓嵯峨尺五青霄近可摩地湧湖光飛匹練雲連海氣鎖

雙螺

尚湖華蕩連浸於南狼山福山對峙海口

珠襦香散紅顏冷寶劍虹藏碧草多

齊女墳吳

王墓俱在亭北

欲問遺蹤何處是清風颯颯拂藤蘿

夜坐

一天風雨暗雕檐古鼎香殘細細添官釀初開陶令酒山園小熟戴
公柑貪看菊影頻移榻爲待蟾光不下幰譙鼓沈沈鄉夢杳客窗新
韻幾回拈

漫吟

梧桐瑟瑟竹蕭蕭閒捲湘幰坐寂寥碎響何來清徹耳半窗疏雨打
芭蕉

遊虎邱

附郭名山著虎邱繁華未始掩清幽畫船十里聯紅袖歌管千家起
翠樓雲氣自來縈塔影嵐光終古落溪流講臺不復生公坐頑石何
時再點頭

立夏前偶成

入夏餘三日春光有幾何鳥聲宿雨少花瓣落風多

舟行湖中

萬里輕舠返平湖正暮秋沙汀來雁陣荻港動漁舟山影天邊淡村
煙水際浮息心爭席後倚棹狎羣鷗

江中

鏡裏行人畫裏舟篷窗深鎖半江秋氣吞巫峽三千里聲到蓬壺十
二樓山隔天光迷雨腳日蒸霞影破雲頭布帆風利難停泊未許金
焦汗漫游

環翠樓聞簫

洞庭山中樓名

草短沙平雁下灘
小樓初夜凭闌干
月明何處吹漁簫
秋水梅花一味寒

翠峰寺

洞庭山

古剎依山竹繞樓
嵐光飛黛結松楸
老僧不解談經偈
但向青巒說石頭

黃浦江待渡

出沒江豚拜碧欄
篷窗薄暮倚闌干
怒潮忽向天邊起
一夜濤聲枕上寒

太湖懷古 二首

扁舟泛五湖
倚棹望姑蘇
嗟哉伍相國
不及范大夫
扁舟泛五湖
倚棹望越都
嗟哉吳西施
不及秦羅敷

納涼

平池倒影落霞紅，碎錦殘花入鏡中。
小樹臨流窗四面，襲人衣袖紫薇風。

登樓

落葉蕭條萬井秋，碧雲天外水東流。
蒼煙古木寒鴉亂，野徑殘陽旅客愁。
千里音書悲雁斷，十年蹤跡感萍浮。
擎杯欲醉何曾醉，惆悵西風獨倚樓。

寄賈丈漢庭 二首

吳淞煙水隔伊人，幾度西樓望月輪。
不信隴頭無驛使，也應寄我一枝春。
今歲山梅特早開，北枝已是點冰苔。
牆陰一樹封殘雪，筍脆芹香待客來。

送別友人

海風吹雨滿山城，小艇蒲帆送客行。
花落沙隄春草綠，水深野港暮

潮平一樽酒盡難言別千里人歸太瘦生北雁有書須遠寄莫教江
樹鎖離情

途中

天外青山隱夕陽煙波縹緲憶江鄉白雲無路歸鴻鵠海燕翩翩底
事忙

野店

柳浪青青麥浪黃山風吹雨溼衣裳微塵不起茆檐潔野棗花開樹
樹香

寄懷友人

碧空銀漢鎖天津萬里西風獨惘神願訴愁心付明月殷勤寄與倚
欄人

閨中作

碧漢無聲萬里清浩然風露夜三更南天極目空相憶明遠樓頭月

正明

過玉簫橋

御池秋水碧潏潏萬樹迎風擁翠塵
驀地天香來水面此身應是月中人

九月七日作

弓月懸星漢寒光落萬家蛩吟清
露重雁帶碧天斜父母憐游子關
山感物華徘徊明鏡裏舉首望浮槎

飲酒

春暮發輕舟旋驚報九秋西風吹落木
寒月下高樓空負千金劍難
銷萬斛愁誰家有美酒不惜紫貂裘

遠望

青山斷處白雲遮山外遙空雁陣斜
萬里西風吹落葉不吹客夢到
天涯

曉至趙北口

短燭燒殘馬暫停渡頭村舍戶猶扃雞聲警露鳴高樹雁陣排空下
遠汀兩岸蘆花飛白雪半湖秋水帶寒星憑欄欲濟無舟楫目極遙
山一抹青

弔谷城項王冢

谷城山下路蒼蒼獨對高峰弔憤王當日拔山矜意氣祇今殘隴牧
牛羊風聲悲似騅嘶月嵐色寒猶劍吐芒空養全鋒誇得鹿長陵秋
草幾斜陽

道中

敝裘不耐曉來涼風捲黃沙嘯白楊極目遙天空悵望馬嘶聲裏又
殘陽

夜坐

雁斷秋空一紙書旅人惆悵意何如夜深自起當軒坐明月蕭蕭落

碧梧

謁和聖柳下惠墓

墓在兗州府城西太守金一鳳立碣道右墓去路一里許冢大如三間屋上有廟一椽設

和聖像廟前有古槐二株根如結蛇數萬布滿南面

展季墳前歧路多村童笑指此間過士存坏土爭王貴人沐遺風識
聖和柳外輕煙歸牧笛洲邊細雨隱漁簑雙槐墓道盤根大十萬龍
蛇效護呵

途間懷洪稚存書壁

鄉關迢遞阻離思冀馬南風鳥北枝嗟我又來黃葉路憶君同聽白
楊時涼雲落照三秋別野草平沙萬里悲他日花驄重此過休忘索
和壁間詩

途中二律

茆店雞初唱長隄策馬過水明殘月出霜重曉寒多夾道迷荒草連
天湧白波敝裘誰補綴蕭瑟奈秋何